

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

## **ZAKLJUČAK**

**o obustavljanju postupka pokrenutog po Zaključku o pokretanju postupka za ocjenu Prijave namjere koncentracije CBS Bank-Sarajevo i Tuzlanske banke -Tuzla**

**Sarajevo**  
**decembar 2006**



Broj: 01-06-26-005-20-II/06  
Sarajevo, 15.12.2006. godine

Na osnovu člana 25. stav (1) tačka e), člana 42. stav (1) tačka g) i člana 43. stav (2), a u vezi sa čl. 12., 14., 15., 16. i 18. Zakona o konkurenciji («Službeni glasnik BiH», broj 48/05) i člana 210. Zakona o upravnom postupku («Službeni glasnik BiH», broj 29/02), a po Prijavi namjere koncentracije podnesenoj od strane NLB Tuzlanske banke d.d. sa sjedištem u Tuzli, ulica Maršala Tita 34, zastupane po direktoru Šahinpašić Almiru, koja je zaprimljena pod brojem: 01-06-26-005-II/06 dana 09.05.2006. godine, Konkurencijsko vijeće na 37. sjednici održanoj dana 15.12.2006. godine, donijelo je

### **ZAKLJUČAK**

1. Obustavlja se postupak pokrenut po Zaključku o pokretanju postupka za ocjenu Prijave namjere koncentracije između CBS Bank d.d., sa sjedištem u Sarajevu, Džidžikovac br. 1, i Tuzlanske banke d.d., sa sjedištem u Tuzli, Maršala Tita 3.
2. Ovaj zaključak je konačan i biće objavljen u «Službenom glasniku Bosne i Hercegovine», službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

NLB Tuzlanska banka d.d., sa sjedištem u Tuzli, ulica Maršala Tita 34, (u daljem tekstu: podnosilac prijave) zastupana po direktoru Šahinpašić Almiru, podnijela je Konkurencijskom vijeću Prijavu namjere koncentracije u skladu sa članom 16. Zakona o konkurenciji (u daljem tekstu: Zakon). Prijava namjere koncentracije se odnosi na pripajanje CBS Bank d.d. sa sjedištem u Sarajevu, ulica Džidžikovac 1 (u daljem tekstu: CBS) Tuzlanskoj banci d.d., sa sjedištem u Tuzli, ulica Maršala Tita 34 (u daljem tekstu: Tuzlanska banka).

Uvidom u Prijavu namjere koncentracije (u daljem tekstu: Prijava) utvrđeno je da ista nije kompletna, te je NLB Tuzlanskoj banci, naloženo da istu dopuni u ostavljenom roku, što je i učinjeno. Nakon dostavljanja kompletne prijave u smislu člana 30. Zakona, Konkurencijsko vijeće je podnosiocu prijave dostavilo Potvrdu o prijemu kompletne i uredne prijave, broj: 01-06-26-005-5-II/06 dana 10.07.2006. godine, kojom je potvrdio da je podnosilac prijave dostavio kompletnu i urednu prijavu namjere koncentracije.

Konkurencijsko vijeće, na osnovu dostavljenih podataka od strane podnosioca prijave kao i drugih saznanja relevantnih za predmetnu koncentraciju, izvršilo je preliminarnu

analizu i ocjenu namjeravane koncentracije. Na osnovu preliminarne analize, Konkurencijsko vijeće je zaključilo da bi namjeravana koncentracija mogla imati za posljedicu značajno narušavanje efikasne tržišne konkurencije na tržištu bankarskih i finansijskih usluga u Bosni i Hercegovini ili bi se na njenom značajnom dijelu mogao stvarati ili jačati dominantni položaj više banaka zajedno u smislu člana 9. Zakona. Iz naprijed navedenih razloga Konkurencijsko vijeće je odlučilo provesti postupak na osnovu člana 32. a u vezi sa članom 18. stav (1) Zakona i donijelo Zaključak o pokretanju postupka, broj: 01-06-26-005-7-II/06 dana 14.07.2006. godine.

CBS Bank d.d., Sarajevo, je dioničko društvo sa sjedištem u Sarajevu, Džidžikovac 1, koja pod ovim nazivom posluje od jula 2003. godine. CBS je osnovana 02.12.1993. godine i upisana je u sudski registar Višeg suda Sarajevo pod brojem UF/I-1782/93 02.12.1993. godine. Dana 20.12.2000. godine u CBS ulazi prvi strani ulagač – Banka Domžale d.d., Domžale, Republika Slovenija kada CBS mijenja naziv u Commercebank d.d. Sarajevo, Grupa Nove Ljubljanske banke. Promjena dioničara je upisana kod Kontonalnog suda Sarajevo pod brojem: UF/I-4987/00 od 21.12.2000. godine. Kupovinom dionica CBS od strane LHB Internationale Handelsbank AG Frankfurt, mijenja se vlasnička struktura, što je izvršeno upisom kod Kantonalnog suda Sarajevo pod brojem: UF/I-1718/01 od 21.12.2001. godine. Ugovorom o istupanju iz reda dioničara i povećanju učešća kapitala jednog dioničara kupovinom dionica između dioničara Commercebank d.d. Sarajevo od 18.10.2002. godine, CBS je postala dioničko društvo sa 100% stranim kapitalom i to: Banka Domžale d.d., Domžale, Republika Slovenija, sa 40% učešća u dioničkom kapitalu i LHB Internationale Handelsbank AG Frankfurt, SR Njemačka, sa 60% učešća u dioničkom kapitalu.

Rješenjem Agencije za bankarstvo Federacije Bosne i Hercegovine broj: 04-3-1183-1/05 od 24.02.2006. godine, Banka Domžale je dobila saglasnost za povećanje učešća u dioničkom kapitalu sa 40% na preko 66,70% u CBS, što je ostvareno kupovinom postojećih dionica u vlasništvu LHB Internationale Handelsbank AG Frankfurt. Na osnovu zaključenog Ugovora o kupovini dionica, kupoprodaja dionica je realizovana preko Sarajevske berze dana 07.04.2006. godine čime je Banka Domžale d.d. Domžale postala 100% vlasnik svih dionica CBS. Nova Ljubljanska banka d.d. Ljubljana, Slovenija je većinski vlasnik Banke Domžale d.d., Domžale i LHB Internationale Handelsbank AG Frankfurt.

Tuzlanska Banka d.d., Tuzla, je dioničko društvo sa sjedištem u Tuzli, Maršala Tita 34, koja posluje od aprila 1990. godine. Rješenjem Agencije za bankarstvo Federacije Bosne i Hercegovine broj: 04-3-580-2/05 od 06.07.2005. godine, Nova ljubljanska banka d.d., Ljubljana, je dobila saglasnost za sticanje većinskog učešća u dioničkom kapitalu Tuzlanske banke. Najveći i navažniji dioničar banke je Nova Ljubljanska banka d.d. Ljubljana sa 83,546% učešća u dioničkom kapitalu.

U martu 2006. godine, skupštine banaka učesnica koncentracije usvojile su Elaborat o ekonomskoj opravdanosti pripajanja CBS Tuzlanskoj banci i Odluku o pripajanju CBS Tuzlanskoj banci koje je i izvršeno 01.07.2006. godine. Ishodna banka je NLB Tuzlanska Banka d.d., Tuzla.

Na osnovu gore navedenih podataka proizilazi da je Nova ljubljanska banka d.d., Ljubljana većinski vlasnik Tuzlanske banke kao i većinski vlasnik CBS i to preko LHB Internationale Handelsbank AG Frankfurt i Banke Domžale d.d., Domžale. To znači da Nova ljubljanska banka d.d., Ljubljana ima kontrolu upravljanja nad navedenim bankama. Zato se u ovom slučaju ne može smatrati koncentracijom pripajanje CBS Tuzlanskoj banci u smislu člana 12. stav (1) tačka a) Zakona. U pitanju je unutrašnja reorganizacija privrednih subjekata, tako da će Nova ljubljanska banka d.d., Ljubljana i dalje biti većinski vlasnik novoosnovane NLB Tuzlanske banke d.d. Tuzla.

Iz naprijed navedenih razloga, Konkurencijsko vijeće je utvrdilo da nije postojala obaveza prijave namjere koncentracije na osnovu člana 16. a u smislu člana 12. Zakona, radi čega je odlučeno kao u dispozitivu ovog zaključka.

### **Pouka o pravnom lijeku**

Protiv ovog zaključka nezadovoljna stranka može pokrenuti upravni spor pred Sudom Bosne i Hercegovine u roku od 30 (trideset) dana od dana prijema ovog zaključka, odnosno od dana njegovog objavljivanja.

**Predsjednik**

**Gordan Raspudić**